

Hiberniæ v Tabula,

Continens Udrona Baroniam, partem Comitatus Regine, ac Domini Fortonelli. In Udronis medio jacet civitas Laghlyn alius Leighlyn, in qua est Episcopalis sedes.

M O M O N I A.

*Regio.
Nomina.
Situs.*

LAGENIÆ succedit in nostra Methodo *Momonid*, Hibernice *Mown*, Anglice *Mounster* quinta & postrema Hiberniæ pars. Ea Vergivio mari ad Austrum exposita jacet, a Connacia Sineo, a Lagenia Negro fluvio alicubi discreta: bifariam quondam divisa in Momoniam Occidentalem & Australem. Occidentalem antiquitus habitaverunt *Gangani*, *Luceni*, *Velabri* & *Uterini*, Australem, *Udia* sive *Vodia*. Nunc autem in septem Comitatus distribuitur, *Kerryensem*, scilicet, *Limricensem*, *Corcagiensem*, *Tripurariensem*, *Sanctæ Crucis*, & *Waterfordiensem*, quorum etiam in numerum *Desmonia* jam accensetur. Hosce Comitatus secundum populos quibus a Cosmographo tribuuntur breviter cum Camdeno percurramus. *Gangani* primo loco supra positi ex nominis affinitate iidem cum Concanis Hispaniæ fuisse videntur, quos origine Scythas, sanguinemque equinum potasse (quod non insolens jam pridem silvestribus Hibernicis) testatur Silius:

*Et qui Massagetem monstrans feritate parentem,
Cornipedis fusa satiaris Concanæ vena.*

Et præter eum Horatius: *Et letum equino sanguine Concanum.*

Kerry (ut nunc vocatur) ad Sinei ostium eorum sedes erat. Regio aviis, & silvestribus montibus ædita, quibus crebræ interfunt valles cavæ nemoribus etiam condensæ. Comitatus Palatini dignitatem, & jura Desmonia Comites in hoc habuere, sed hominum iniquitate, qui libertate uti & noluerunt, & nescierunt, in malorum sentinam, & seditiosorum perfugium jam pridem conversa erat. Hujus regionis mediâ fluviolus nunc anonymus *Trailes* opidulum quodammodo desolatum (ubi Desmonia Comites ædes habuerunt) præterfluens interfecat, quem *Dur* esse Ptolemæi, situs quodammodo innuit. Non procul hinc *Smerwic* statio (sic contracte pro *S. Mari-wic*) cernitur, ad quam ante annos aliquot cum Giraldus Desmonia Comes vir profunda in Principem & patriam perfidia, scelerate assiduis agrorum vastationibus Momoniam artereret, appulsa est tumultuaria Italarum & Hispanorum manus a Gregorio PP. & Hispano in ejus auxilium submissa, qui loco hic stativis munito, quem *Fort del Ore* vocarunt, minis cælum terrebant. Sed illustrissimi & bellicosi Baronis Domini Arthuri Grei Proregis adventus, & primus impetus rem decrevit. Protinus enim se dederunt, & maximam partem e medio sublatis, quod rebus hujus Regni sic ferentibus, & seditiosis undique imminentibus, consultissimum & tutissimum videbatur. Ipseque Desmonius tandem trepida fuga in vicinas silvas conjectus, jamdudum in tuguriolo ab uno & altero milite irruente primum sauciatus, postea agnitus, capiteque truncatus, perfidiæ & vastatæ patriæ meritis poenas dependit. Ganganis subiecta est longe lateque ad Austrum *Desmonia*, Hibernis *Dassown*, Anglis *Desmond*, quondam a tribus infesta populis, *Lucenis* scilicet, *Velabris*, & *Ibernis*, qui

Uterini